

En Euro mett em Babbegei?

Jetzt hawwe mer die gonz Zeit gewart, dass er nit kimmt, und jetzt is er doch doo, de Euro.

Hab ich mer doch gleich om Mondaach so en „Starterkit“ – was e Wort, doo konnste derr alles möchliche drunner vorstelle, nor koo Geld! - ferr zwonzich Mark gehollt unn habb jetzt so en Satz Euro-Münze dehoom. Unn guck, die hawwe aach ihr scheene Seite, du brauchst se nor mol umzedrehe. Uff de Rückseit siehstde joo im Aacheblick nor so deutschnationale Embleme, awwer wenn emol e Zeit errum is unn du kriechst Münze von dene onnern Länder in doi Portmonnee, dann konnste dort unner annerem de spanische Könich, e griechisch Eul odder zwaa finnische Schwän bewunnern. Wennsde awwer hinne en Babbegei odder en Elefont siehst, dann hossde Falschgeld erwischt. Hoffentlich wisse dess aach die vom Aldi, awwer so wie ich die kenn, werrn die aach des neie Geld onn de Kass abpiepe, ob des richtig oder falsch is - koo Wunner, dass dann alles so deier werd.

Jaja, hott de Karl gesacht, ich mett moim aahle Kopp, dess werd was gewwe im neie Joohr beim Oikaafe, die gonz Rechnerei mett de D-Mark unn dene Euro, doo stehste joo stunnelong onn de Kass! Denn was iss, wenn ooner nooch Neijohr ferr 29 Euro 90 oikaaft unn gibt dem Mädche hunnert Mark? Die gibt em dann in Euro erraus, woher waaß der dann, ob soi Geld stimmt? Doo wird halt jeder soin Dascherechner mitnemme unn kontrolliern, doo brauchtsde zwaa Stund ferr e Päckche Wespulver.

Doo hott de Schorsch gemoont, es werd alles nit so schlimm, wenn ihr dess so macht wie ich unn moi Kättche. Mir gewwe nämlich bis Silvester unser gonz Bargeld aus und mache unsern Keller voll mit Wespulver, Äppelwoi, Bohnesupp unn Nudele, dann brauche mer die erst Woch nit oikaafe geh. Unn wenn e paar Daach erum sinn, dann hott sich des alles reguliert, dann hewe mer die Rente in Euro ab unn gehn erst dann widder was kaafe, mir brauche joo koo frisch Milch odder so ferr kloone Kinner.

Honnes, hot doodruffhie de Karl gegauzt, hott de Schorsch ewe „kloone“ gesacht? Moi Konto hawwe se nemlich grad uff Euro umgestellt, unn jetzt waaß ich, was „klone“ heest, von dem ewe so vill in de Zeitung steht. Dess is doch was onnerst, habb ich gemoont, doodebei werd doch was verdoppelt. Naa, hott de Karl gesacht, doo hoste was verkehrt verstonne, geh emol uff die Bonk unn guck doi Konto oo, mir jedenfalls sinn die Träne kumme, weil se moi Geld geklont hawwe.

Eigentlich is es joo aach werklich zum Heule, dass die Mark verschwinne dut, awwer, so hab ich gelese, des mett dem Euro is de Preis ferr die deutsch Einheit, mir hawwe die Osis gewonne unn die Mark verlorn. Uns hat mer halt gesacht, mer könnte nit alles hawwe.

Vielleicht könne mer jo nooch e paar Johr die Euro widder in Mark umdausche, awwer was mache mer dann met de Osis?

Glaabt mers, dess dauert e bissje, bis mir mett dem neie Geld vertraut sinn. Awwer wenn mer erst emol, so vielleicht in em Johr, onn de Tankstell 1,97⁹ für de Liter Benzin lese könne, donn sinn mer drin, donn sinn mer in de neu Währung dehoom.

Eiern Honnes